

四庫全書

子部

欽定四庫全書

子部

冊府元龜卷七百七十三  
六

詳校官中書臣吳瓌

侍讀臣孫球覆勘

總校官庶吉士臣何思鈞

校對官助教臣胡子襄

謄錄監生臣李椿

欽定四庫全書

冊府元龜卷七百七十三 宋 王欽若等撰

總錄部

幼敏

書曰惟人萬物之靈若夫幼而慧少而成者益可貴矣  
中古而下英妙間出乃有特稟異資迴越倫萃岐嶷兆  
於襁褓穎悟發於齒齡學疑宿習動彰默識或未就外  
傳已通羣籍甫及志學即為人師識洞於未萌智表於

先見心計足以成務口辯足以解紛老成之姿著於容  
止賦筆之麗成於俄頃至行出於天性玄譚絕於流俗  
時輩推尚英聲騰鶩斯仲尼所謂生知之者歟

后稷名棄為兒時屹如巨人之志其遊戲種樹麻菽麥  
及成人遂好耕農相地之宜宜穀者稼穡焉民皆法則  
之帝堯聞之舉棄為農師

楚為賈為大夫楚子將圍宋使子文治兵於睽終朝而  
畢不戮一人子玉復治兵於蔿終日而畢鞭七人貫三

人耳國老皆賀子文子文飲之酒賈尚幼後至不賀子  
文問之對曰不知所賀子之傳政於子玉曰以靖國也  
靖諸內而敗諸外所獲幾何子玉之敗子之舉也舉以  
敗國將何賀焉且子玉剛而無禮不可以治民過三百  
乘其不能以入矣苟入而賀何後之有

子玉果敗於城濮

周王孫滿尚幼秦師過周北門左右免胄而下超乘者  
三百人王孫滿觀之言於王曰秦師輕而無禮必敗

謂過

天子門不卷甲  
東兵超乘示勇

輕則寡謀無禮則脫

脫易也

入險而脫又

不能謀能無敗乎

晉果敗秦師于穀  
獲秦三帥以歸

范匄晉大夫也士燮之子

士燮范  
文子也

晉楚遇於鄆陵楚晨

壓晉軍而陳軍吏患之匄趨進曰塞井夷竈陳於軍中

而疏行首

疏行首者當陳前決  
開營壘為戰道也

晉楚惟天所授何患焉

文子執戈逐之曰國之存亡天也童子何知焉

國僑字子產鄭大夫也魯襄公八年其父子國與子耳

侵蔡獲蔡司馬公子燮鄭人皆喜子產不順

子產不順  
衆而喜

曰小國無文德而有武功禍莫大焉楚人來討能勿從

乎從之晉師必至晉楚伐鄭自今鄭國不四五年弗得  
寧矣子國怒之曰爾何知國有大命而有正卿童子言  
焉將為戮矣是秋楚子囊伐鄭討其侵蔡鄭及楚平九  
年十月晉帥諸侯伐鄭鄭人恐乃行成十一月楚子伐

鄭鄭及楚平十年九月晉帥諸侯伐鄭鄭及晉平楚救

鄭鄭與楚人盟十一年晉伐鄭

自是鄭遂服

衛公孫彌牟字子之衛大夫也初魯哀公十二年秋衛  
侯會吳吳人藩衛侯之舍既歸效夷言子之尚幼曰君

必不免其死於夷乎執馬而又說其言從之固矣

出公  
輒後

卒死  
於越

孔子為兒嬉戲嘗陳俎豆設禮容

閭丘印齊人年十八道遮齊宣王曰家貧親老願得小  
仕宣王曰子年尚稚未可也閭丘印對曰不然臣聞昔  
有顛頊行年十二而治天下秦項橐七歲為聖人師繇  
此觀之印不肖年不稚矣宣王曰未有尺角驂駒而能  
服重致遠者也繇此觀之夫士亦華髮墮顛而後可用



耳聞丘印曰不然夫尺有所短寸有所長騂駟駮驥天下之俊馬也使之與狸馳試之於塗竈之間其疾未必能過狸馳也黃鵠白鶴一舉千里使之與燕服翼試於堂廡之下廬室之間其便未必能過燕服翼也辟閭巨闕天下之利劍也擊石不缺刺石不銼使之與管彙決耳出昧其便未必能過管彙也絲此觀之華髮墮顛與印何以異哉宣王曰善子有善言則何見寡人之晚也印對曰夫雞豚謹噉即奪鐘鼓音雲霧充咽則奪日月

明讒人在側是以見晚也詩曰聽言則對譖言則退庸  
得進乎宣王拊軾曰寡人有過遂載與之俱歸而用焉  
田文齊人號孟嘗君靖郭君嬰之子也嬰有子四十餘  
人文母其賤妾也文以五月五日生嬰告其母曰勿舉  
也其母竊舉生之及長其母因兄弟而見其子文於嬰  
嬰怒其母曰吾令若去此子而敢生之何也文頓首因  
曰君所以不舉五月子者何故嬰曰五月子者長與戶  
齊特不利其父母文曰人生受命於天乎將受命於戶

邪嬰默然文曰必受命於天君何憂焉必受命於戶則可高其戶耳誰能至者嬰曰子休矣

甘羅者甘茂之孫年十二事秦相文信侯呂不韋為舍人秦始皇帝使剛成君蔡澤於燕三年而燕王喜使太子丹入質於秦秦使張唐往相燕欲與燕共伐趙以廣河間之地張唐謂文信侯曰臣嘗為秦昭王伐趙趙怨臣曰得唐者與百里之地今之燕必經趙臣不可以行文信侯不快未有以強也甘羅曰君侯何不快之甚也

文信侯曰吾令剛成君蔡澤事燕三年燕太子丹已入質矣吾自請張卿相燕而不肯行甘羅曰臣請行之文信侯叱曰去我身自請之而不肯汝焉能行之甘羅曰夫項橐生七歲為孔子師今臣生十二歲於茲矣君其試臣何遽叱乎於是甘羅見張卿曰卿之功孰與武安君卿曰武安君南挫強楚北威燕趙戰勝攻取破城墮邑不知其數臣之功不如也甘羅曰應侯之用於秦也孰與文信侯專張卿曰應侯不如文信侯專甘羅曰卿

明知其不如文信侯專與曰知之甘羅曰應侯欲攻趙武安君難之去咸陽七里而立死於杜郵今文信侯自請卿相燕而不肯行臣不知卿所死處矣張唐曰請因孺子行令裝治行行有日甘羅謂文信侯曰借臣車五乘請為張唐先報趙文信侯及入言之於始皇曰昔甘茂之孫甘羅年少耳然名家之子孫諸侯皆聞之今者張唐欲稱疾不肯行甘羅說而行之今願先報趙請許遣之始皇召見使甘羅於趙趙襄王郊迎甘羅甘羅說

趙王曰王聞燕太子丹入質秦歟曰聞之曰聞張唐相  
燕歟曰聞之曰燕太子丹入秦者燕不欺秦也張唐相  
燕者秦不欺燕也燕秦不相欺者伐趙危也燕秦不相  
欺無異故欲攻趙而廣河間王不如齎臣五城以廣河  
間請歸燕太子與強趙攻弱燕趙王立自割五城以廣  
河間秦歸燕太子丹趙攻燕得上谷三十城今秦有十  
一甘羅還報秦乃封甘羅為上卿復以始甘茂田宅賜  
之

漢外黃令舍人兒

史失其姓名

年十三時項羽擊陳留外黃

不下數日降羽悉令男子年十五以上詣城東欲阬之

舍人兒

令之舍人兒也

往說羽曰彭越強劫外黃恐故且降待

大王大王又皆阬之百姓豈有所歸心哉從此以東梁地十餘城皆恐莫肯下矣羽然其言乃赦外黃當阬者而東至睢陽聞之皆爭下

張辟疆留侯之子也呂太后哭惠帝而泣不下

泣謂淚

辟

疆為侍中年十五謂丞相陳平曰太后獨有帝今哭而

不悲君知其解未

解謂解說其意

陳平曰何解辟疆曰帝無壯

子太后畏君等今請拜吕台吕產為將將兵居南北軍

及諸吕官居中用事如此則太后心安君等幸脫禍矣

脫免也

丞相如辟疆計請之太后說其哭廼哀

賈誼雒陽人年十八能誦詩書屬文稱於郡中後為長沙主簿

張湯杜陵人父為長安丞出湯為兒守舍還鼠盜肉父怒笞湯湯掘熏得鼠及餘肉劾鼠掠治傳爰書訊鞠論



報

傳謂傳達追送若今之追逆赴對也爰換也以文書代換其口辭也訊考問也鞠窮也謂考問之也論報

謂上論之而獲報也

并取鼠與肉具獄磔堂下父見之視文辭如

老獄吏大驚遂使書獄後為御史大夫

終軍少好學以辯博能屬文聞於郡中年十八選為博士弟子至府受遣太守聞其有異材召見軍甚奇之與交結軍揖太守而去後軍死世謂之終

桑宏羊武帝時以心計年十三為侍中

張禹為兒數隨父至市喜觀於卜相者前久之頗曉其

別著布卦意時從旁言卜者愛之又奇其面貌謂禹父曰是兒多知可令學經後位特進封安昌侯

童烏揚雄子也雄嘗曰吾家之童烏九齡而與我論元後漢鄧禹字仲華南陽新野人年十三能誦詩受業長安時光武亦遊學京師禹年雖幼而見帝知非常人遂相親附後位至太傅

魯恭父為甘陵太守卒官時恭年十二弟丕年七歲晝夜號踊不絕聲郡中賻贈無所受乃歸服喪禮過成人

鄉里竒之恭年十五與丕居太學兄弟俱為諸儒所稱  
學士爭歸之後為司徒

張堪年十六受業長安志美行厲諸儒號曰聖童光武  
微時見堪志操嘗嘉焉官至漁陽太守

馮衍幼有竒才年九歲能誦詩書至二十而博通羣書  
後為司隸從事以文過其實廢於家

杜安年十歲名稱鄉里至十五入太學號曰神童

朱勃年十二能講詩書嘗候馬援兄况勃衣方領能矩

步辭言嫺雅卒為雲陽令

馬客卿援子也幼而岐嶷年六歲能應接諸公專對賓客嘗有死罪亡命者來過客卿逃匿不令人知外若訥而沈敏援甚竒之以為將相器故以客卿字焉及援卒客卿亦天歿

周防年十六仕郡小吏光武巡狩汝南召掾吏試經防尤能誦讀拜為守丞

任延年十二為諸生學於長安明詩易春秋顯名太學

學中號為任聖童後為河南太守卒

丁鴻年十三從桓榮受歐陽尚書三年而明章句善論  
難為都講官至司徒

范升少孤依外家居九歲通論語孝經

班固年九歲能屬文誦詩賦後為聊城令坐事免

吳祐字季英陳留長垣人父恢為南海太守祐年十二

隨從到官恢欲殺青簡以寫經書

青者以火炙簡令汗取其漬易書復不盡

謂之殺青亦謂之汗簡

祐諫曰今大人踰越五嶺遠在海濱其俗

誠陋然舊多珍恠上為國家所疑下為權威所望此書  
若成則載之兼兩昔馬援以薏苡興謗王陽以衣囊徼  
名嫌疑之間誠先賢所慎也恠乃止撫其首曰吳氏世  
不乏季子矣

季子謂季札也

後為大將軍梁冀長史

張霸年數歲而知孝讓雖出入飲食自然合禮鄉人稱  
為張曾子七歲通春秋復欲進餘經父母曰汝小未能  
也霸曰我饒為之故字曰伯饒後四遷為侍中卒

楊終年十三蜀郡人為郡小吏太守竒其才遣詣京師

受業習春秋

一云蜀郡有雷震洪曹終上白以為斷獄煩苛所致太守乃令終賦雷電之意而奇

之後為郎中卒

楊厚母與前妻子不相安厚年九歲思令和親乃託疾不言不食母知其指瞿然改意思養加篤徵拜議郎三遷至侍郎

虞詡字升卿陳國武平人也十二能通尚書後辟太尉府旋遷郎中至尚書令

謝康汝南人與河南趙建章年始十二各能通經尚書

左雄竝奏拜童子郎於是負書來學雲集京師知名太學

崔駰年十三能通詩易春秋博學有偉才盡通古今訓詁百家之言善屬文少游太學與班固傅毅同時齊名以處士辟車騎將軍掾

周燮始在髻髻而知廉讓十歲就學能通詩論後安帝以元纁羔幣聘燮不起

馬續七歲能通論語十三明尚書十六治詩博觀羣籍



善九章筭術順帝時為護羌校尉遷度遼將軍

陳蕃字仲舉汝南平輿人也年十五嘗閑處一室而庭  
宇蕪穢父友同郡薛勤來候之謂蕃曰孺子何不洒掃  
以待賓客蕃曰大丈夫處世當掃除天下安事一室乎  
勤知其有清世志終位至太尉太傅錄尚書事

荀爽幼而好學年十二能通春秋論語太尉杜喬見而  
稱之曰可為人師後位至司空

黃香江夏安陸人也年十二太守劉護召之署門下遂

博學經典究精道術能文章京師號曰天下無雙江夏黃童初除郎中終魏郡太守

黃琬江夏安陸人少失父早而辯慧祖父瓊初為魏郡太守桓帝建和元年正月日食京師不見而瓊以狀聞太后詔問所食多少瓊思其對而未知所況琬年七歲在傍曰何不言日食之餘如月之初瓊大驚即以其言應詔而深竒愛之後瓊為司徒琬以公孫拜童子郎辭病不就知名京師時司空盛允有疾瓊遣琬候問會江

夏上蠻賊事副府

副本詣公府也

允發書視畢微戲琬曰江夏

大邦而蠻多士少琬奉手對曰蠻夷猾夏責在司空因拂衣辭去允甚竒之後位至司徒太尉

臧洪年十五以父功拜童子郎知名太學後為東郡太守

陳實為太邱長出於單微自為兒童雖在戲弄為等類所歸

荀悅為秘書監侍中初年十二能說春秋貧無書每之

人家所見篇牘一覽多能誦記

孔融為北海相幼有異才年十歲隨父詣京師時河南尹李膺以簡重自居不妄接士賓勅外自非當世名人及與通家皆不得白融欲觀其人故造膺門語門者曰我是李君通家子弟門者言之膺請融問曰高明祖父嘗與僕有恩舊乎融曰然先君孔子與君先人李老君同德比義而相師友則融與君累世通家衆坐莫不歎息大中大夫陳煒後至坐中以告煒煒曰夫人少而聰

了大未必奇融應聲曰觀君所言將不早慧乎膺大笑

曰高明必為偉器融後為曹公所殺融二子皆齧齒融

既見叔顧謂二子曰何以不辭二子俱曰父尚如此復

何以辭以為必俱死也

一云二子年八歲時方奕碁融被叔二子端坐不起左右曰若

父見執而不起何也二子曰安有巢毀而卵不破者

魏邴原年十一而喪父家貧早孤鄰有書舍原過其傍

而泣師問曰童子何悲原曰孤者易傷貧者易感夫書

者必皆具有父兄者一則羨其不孤二則羨其得學心

中惻然而為涕零也師亦哀原之言而為之泣曰欲書可耳答曰無錢資師曰童子苟有志我徒相教不求資也於是遂就書一冬之間誦考經論語自在童齒之中  
疑然有異後為五官將長史卒

賈達字梁道河東襄陵人自為兒童戲弄嘗設部伍祖父習異之曰汝大必為將率口授兵法數萬言終豫州刺史

司馬朗字伯達九歲人有道其父字者朗曰慢人親者

不敬其親也容謝之十二歲試經為童子郎監試者以其身體壯大疑朗匿年劾問朗曰朗之內外累世長大朗雖穉弱無仰高之風損年以求蚤成非志所為也監試者異之後至兗州刺史

王弼字輔嗣幼而察慧年十餘歲好左氏通辯能言後為尚書

鍾會太尉繇小子敏慧夙成五歲繇遣見蔣濟濟甚異之曰非常人後為司徒

任昭先名淑世為著姓夙智蚤成鄉人為之語曰蔣氏翁任氏童年十四始學疑不再周三年中誦五經皆曉其義兼包羣言無不綜覽於時學者號之為神童

荀攸字公達或從子也祖父曇廣陵太守攸少孤及曇卒故吏張權求守曇墓攸年十三疑之謂叔父衢曰此更有非常之色殆將有姦衢寤乃推問果殺人亡命繇

是異之

一云攸年十八歲衢曾醉誤傷攸耳而攸出入遊戲常避護不欲令衢見衢後聞之大驚其夙

智如此位至尚書令



常林河內溫人年七歲有父黨造門問林伯先在否汝何不拜林曰雖當下客臨子字父何拜之有於是咸共嘉之後為光祿大夫

管輅年八九歲便喜仰視星辰得人輒問其名夜不肯寐父母常禁之猶不可止自言我年雖少然眼中喜視天文嘗云家雞野鵠猶尚知時况於人乎與隣比兒共戲土壤中特畫地作天文及日月星辰每答言說事語皆不常宿學者人不能折之皆知其當有大異之才父

為琅琊郡丘長時年十五來至官舍讀詩論語及易本  
便開胸布筆辭義斐然于時黌上有遠方及國內諸生  
四百餘人皆服其才也琅琊太守單于春雅有才度聞  
輅一黌之雋欲得見輅父即遣造之太守賓客百餘人  
坐上有能言之士輅問于春府君名士加有雄貴之資  
輅既年少膽未堅剛若欲相觀懼失精神先飲三升清  
酒然後而言之子春大喜便斟三升清酒獨使飲之酒  
盡之後問于春今欲與輅為對者若府君四坐之士邪

子春曰吾欲自與卿旗鼓相當輅言始讀詩論語易本  
學問微淺未能上引聖人之道陳秦漢之事但欲論金  
木水火土鬼神之情耳子春言此最難者而卿以為易  
邪於是唱大論之端遂經於陰陽文采葩流枝葉橫生  
少引聖經多發天然子春及衆士互共攻詰論難蜂起  
而輅人人答對言皆有餘至日向暮酒食不行子春語  
衆人曰此年少盛有才器聽其言論正似司馬犬子遊  
獵之賦何其磊落雄壯英神以茂必能明天文地理變

化之數不徒有言也於是發聲徐州號之神童後為少府丞

蜀諸葛瞻字思遠亮子也亮與兄瑾書曰瞻今已八歲聰慧可愛嫌其蚤成不為重器耳十七尚公主拜騎都尉後為衛將軍

吳虞翻少好學有高氣年十二客有候其兄者不過翻翻追與書曰僕聞虎兔不取腐芥磁石不受曲針過而不存不亦宜乎客得書竒之繇是見稱仕為騎都尉

陸績年六歲於九江見袁術術出橘績懷三枚去拜辭  
墮地術謂曰陸郎作賓客而懷橘乎績跪答曰欲歸遺  
母術大奇之孫策在吳張昭張紘秦松為上賓共論四  
海未泰須當用武治而平之績年少未坐遙大聲言曰  
昔管夷吾相齊桓公九合諸侯一匡天下不用兵車孔  
子曰遠人不服則修文德以來之今論者不務道德懷  
取之術而惟尚武績雖童蒙竊所未安也昭等異焉後  
為鬱林太守

諸葛恪少有才名發藻岐嶷辨論應下莫與為對大帝見而竒之謂父瑾曰藍田生玉真不虛也位至太傅荆揚州牧督中外諸軍事

朱桓子異張惇子純與張儼俱童少往見驃騎將軍朱據據聞三人才名欲試之告曰老鄙相聞渴甚矣夫騷裹以迅驟為功鷹隼以輕疾為妙其為吾各賦一物然後乃坐儼乃賦犬曰守則有威出則有獲韓盧宋鵲書名竹帛純賦席曰席以冬設簟為夏施揖讓而坐君子

攸宜異賦弩曰南嶽之榦鍾山之銅應機命中獲隼高  
墉三人各隨其目所見而賦之皆成而後坐據大歡悅  
桓後為前將軍青州牧

沈友豫章人年十一太守華歆出行風俗見而異之因  
呼曰沈郎可登車語乎友逡巡却曰君子講好會宴以  
禮今仁義陵遲聖道漸壞先生銜命將以裨補先王之  
教整齊風俗而輕脫威儀猶負薪救火無乃更崇其熾  
乎歆慙曰自桓靈以來雖多英彥未有幼童若此者仕

為丹陽太守

丁覽山陰人八歲而孤家又單微清身立行用意不苟  
推賄從弟以義讓稱為功曹守始平長

徐平字伯先太末人童齒知名虞翻甚愛之屢稱歎焉  
後為武昌左都督

冊府元龜卷七百七十三



欽定四庫全書

冊府元龜卷七百七十四 宋 王欽若等撰

總錄部

幼敏第二

晉荀顗魏太尉彧之第六子幼爲妹婿陳羣所賞性至孝總角知名博學洽聞理思周密位至侍中太尉行太子太傅

荀勗漢司空爽曾孫祖棐射聲校尉父盼早亡勗依於

舅氏岐嶷夙年十餘歲能屬文從外祖魏太傅鍾繇曰  
此兒當及其曾祖及長遂博學達於政事後爲守中書  
監侍中卒

羅憲年十三能屬文早知名師事譙周周門人稱爲子  
貢終於陵江將軍節度領武陵太守

裴秀魏尚書令潛之子也少好學有風操八歲能屬文  
叔父徽有盛名賓客甚衆秀年十餘歲有詣徽出則過  
秀時人爲之語曰後進領袖有裴秀位至司空

潘岳少以才穎見稱鄉邑號爲竒童謂終賈之儔後官  
至給事黃門侍郎

王戎年六七歲嘗與羣兒戲於道側見李樹多實等輩  
竟趨之戎獨不往或問其故戎曰樹在道邊而多子必  
苦李也取之信然終於司徒

王衍父又爲平北將軍嘗有公事使行人列上不時報  
衍年十四在京師造僕射羊祜申陳事狀辭甚辯祜名  
德貴重而衍幼年無屈下之色衆咸異之位至太尉尚

書令

王澄生而警悟雖未能言見人舉動便識其意終於軍  
諮祭酒

盛彥少有異才年八歲詣吳太尉戴昌昌贈詩以觀之  
彥於坐答之辭甚慷慨彥仕吳至中書侍郎吳平劉頌  
舉爲小中正卒

陸雲六歲能屬文吳尚書廣陵閔鴻見而竒之曰此兒  
若非龍駒當是鳳雛後舉雲賢良時年十六後官至太

尉都督前鋒

周光少有父風年十一見王敦敦謂曰貴郡未有將誰  
可用者光曰明公不耻下問竊謂無復見勝敦笑以爲  
寧遠將軍尋陽太守

高崧少好學善史書總角時司空何充稱其明慧充爲  
揚州引崧爲主簿益相欽重

范宣年十歲能誦詩書嘗以刀傷手捧手改容人問痛  
否答曰不足爲痛但受全之體而致毀傷不可處耳家

人以其年幼而異焉後詔徵太學博士散騎郎並不就  
王允之總角時從從伯敦敦與錢鳳謀逆而允之時飲  
酒醉帳中臥悉聞其言慮敦疑之便於臥處吐涕狼藉  
敦果疑遣看之見吐唾以爲醉不復疑之允之爲衛將  
軍會稽內史卒

王儉字元衡內史下邳陳邨擅名徐州邨聞儉年十四  
善屬文請作祝文邨請郡客曰此生爲文有可觀採命  
爲督郵主簿邨遷給事中儉每爲定表

褚陶弱不好弄少而聰慧清淡間默以墳典自娛年十三作鷗鳥水磴二賦見者竒之位至中尉

庾闡好學九歲能屬文後爲著佐吳國內史卒

李矩童胤時與羣兒聚戲便爲其率計畫指授有成人之量矩終於安西將軍司州刺史

孔衍少好學年十二能誦詩書位至廣陵太守

賀循會稽山陰人吳中書令邵之子邵爲孫皓所殺徙家屬邊郡循少嬰家難流放海隅吳平乃還本郡操尚

高厲童觀不羣言行進止必以禮讓相國丁又請爲五  
官掾

成公綏幼而聰敏博涉經傳性寡欲不營資產家貧歲  
饑晏如也少有俊才詞賦甚麗後爲中書郎卒

韓康伯母殷氏高明有行家貧窶伯年數歲至大寒母  
方爲作襦令伯捉熨斗而謂之曰且著襦尋當作複禪  
伯曰不復須母問其故對曰火在斗中而柄尚熱今既  
著襦下亦當煖母甚異之位至丹陽尹吏部尚書領軍



將軍

張憑祖鎮爲蒼梧太守憑年數歲鎮謂其父曰我不如汝有佳兒憑曰阿翁詎宜以子戲父耶憑後爲吏部郎御史中丞卒

荀羨清和有準纔年七歲遇蘇峻難隨父在石頭峻甚愛之嘗置膝上羨陰白其母曰得一利刀子足以殺賊母掩其口曰無妄言羨終於右軍將軍

王珉珣之弟也有外國沙門名提婆妙解法理爲珣兄

弟講毗曇經珉時尚幼講未半便云已解即於別室與沙門法綱等數人自講法綱歎曰大義皆是但小未精耳

謝尚鯤之子八歲神悟夙成鯤嘗攜之送客或曰此兒一坐之顏回也尚應聲答曰坐無尼父焉別顏回席賓莫不歎異年十餘歲遭父憂丹陽尹溫嶠弔之尚號咷極哀既而收涕告謝舉止有異常童嶠甚竒之

謝安總角神識沉敏風宇條暢善行書父奕爲剡令有

老人犯法奕以醇酒飲之醉猶未已安時年七八歲在奕膝邊諫止奕為改容遣之安位至太保

謝玄安之兄子少頴悟與從兄朗俱為安所器安嘗戒約子姪因曰子弟亦何預人而正欲使其佳諸人莫有言者玄答曰譬如芝蘭玉樹欲使其生於堦庭耳安悅玄終於散騎常侍左將軍會稽內史

謝朗安之兄子善言玄理文義艷發名亞於元總角時病新起體甚羸不堪勞於安前與沙門支遁講論遂至

相苦其母王氏再遣信令還安欲留使竟論王氏因出云新婦少遭難一生所寄惟在此兒流涕携朗去郎後位至東陽太守

王獻之年數歲嘗觀門生携蒲曰南風不競門生曰此郎亦管中窺豹特見一斑獻之怒曰遠慙荀奉倩近愧劉真長遂拂衣而去獻之官至建威將軍吳興太守

孫放字齊莊盛之次子幼稱令慧年七八歲在荊州與父俱從庾亮獵亮謂曰君亦來邪應聲答曰無小無大

從公于邁亮又問欲齊何莊邪放曰欲齊莊周亮曰不  
慕仲尼邪答曰仲尼生而知之非希企所及亮大奇之  
曰輔嗣弗過也庾翼子爰客嘗候盛見放而問曰安國  
何在放答曰庾稚恭家爰客大笑曰諸孫大盛有兒如  
此也放又曰未若諸庾翼翼既而語人曰我故得重呼  
奴父也放終於長沙相

戴逵總角以雞卵汁澣白瓦屑作鄭元碑又爲文而自  
鐫之詞麗器妙時人莫不驚歎逵武帝時以太學博士

給事中累徵不起

王修明秀有美稱善隸書號曰流奕清舉年十二作賢  
全論父濛以示劉悛曰此論便足以參微言修終於著  
作郎

范喬年三歲時祖馨臨終撫喬首曰恨不見汝成人因  
以所用硯與之至五歲祖母以告喬喬便執硯涕泣九  
歲詣學在同輩之中言無媒辭喬後除樂安令辭疾不  
拜

宋謝瞻六歲能屬文爲紫石英讚果然

果然獸名

詩當時才

士莫不歎異後爲護南蠻校尉荊州刺史

蔡興宗幼爲父廓所重廓與親故書曰小兒四歲神氣似可不入非類室不與小人遊故以興宗爲之名興宗年十歲失父哀毀有異凡童父廓罷豫章郡還起二宅先成東宅與弟軌廓亡而館宇未立軌罷長沙郡還送錢五十萬以補宅直興宗年十歲白母曰一家由來豐儉必共今日宅價不宜受也母悅而從焉軌有愧色謂

其子談曰我年六十行事不及十歲小兒興宗終於光祿大夫

謝宏徵童幼時精神端審時然後言所繼叔父混名知人見而異之謂宏徵父思曰此兒深中夙敏方成佳器有子如此足矣年十歲出係從叔峻所係父於宏徵本總麻親戚中表素不相識率意承接皆合禮衷後爲右衛將軍卒

謝莊年七歲能屬文通論語位至金紫光祿大夫



沈林子字敬士少有大度年數歲隨王父在京口王恭見而竒之曰此兒王子師之流也與衆人共見遺寶咸爭趨之林子直去不顧

徐湛之年數歲與弟淳之共車行牛奔車壞左右人馳來赴之湛之先令取弟衆咸歎其幼而有識後終於尚書僕射領護軍將軍

沈璞童孺時神意間審有異於衆太祖問其父林子曰聞君小兒器質不凡甚欲相識林子令璞進見太祖竒

璞應對謂林子曰此非常兒年十許歲智度便有大成之姿

王絢或之子年七歲讀論語至周監於二代外祖何尚之戲之曰耶耶乎文哉絢即答曰草翁之風必偃位至祕書丞相卒

王魯綽左光祿大夫曇首之子幼有大成之度弱年衆以國器許之好學有理思練悉朝典年十三喪父太祖引見下拜便流涕哽咽帝亦悲不自勝襲封豫章縣侯

尚太祖長女東陽獻公主官至吏部尚書

袁叔少有風氣年數歲伯湛謂家人曰此非凡兒至十餘歲爲姑夫王宏所賞不爲章句之學而博涉多通好屬文辭采道艷縱橫才辯終於太子左衛率

王僧達太保宏少子幼聰敏宏爲州時僧達年七歲遇有通訟者竊覽其辭謂爲有理及人訟者亦進宏意其小留左右僧達爲申理聞誦不失一句文帝聞其早慧召見於德陽殿問其書學及家事應對閒敏帝甚知之

妻以臨川王義慶女位至中書令

謝靈運晉車騎將軍玄之孫幼便穎悟元甚異之官至  
臨川內史

謝惠連幼而聰敏年十歲能屬文族兄靈運深相知賞  
後爲彭城王法曹後參軍卒

何承天五歲失父其母徐氏廣之姊也聰明博學故承  
天幼漸訓義儒史百家莫不該覽位至廷尉

裴松之年八歲學通論語毛詩博覽墳籍立身簡素後

爲大中大夫卒

南齊顧歡年六七歲書甲子有簡三篇歡析計遂知六  
甲家貧父使驅田中雀歡作黃雀賦而歸雀食稻過半  
父怒欲撻之見賦乃止永明元年詔徵爲太學博士不  
就

謝瀹年七歲王彧見而異之言於宋孝武詔見於稠人  
廣衆之中瀹舉動間詳應對合旨帝甚悅詔尚公主值  
景和敗事寢後終於太子詹事

王慈僧虔之子年十歲與蔡興宗子約入寺禮佛遇沙  
門懺約戲慈曰衆僧今可謂虔慈應聲曰卿如此何以  
興蔡氏之宗

劉歊篤志好學博通訓義年五歲聞舅孔氏熙先讀管  
寧傳欣然欲讀舅更爲之說精意聽受曰此可及也嘗  
爲會稽郡丞後除步兵校尉不拜卒

虞愿祖賚給事中監利侯中庭橘樹冬熟子孫竟來取  
之愿數歲獨不取賚及家人皆異之位至廷尉東觀祭酒

褚淵字彥回幼有清譽宋元嘉末魏軍逼瓜步百姓咸  
負擔而立時淵父湛之爲丹陽尹使其子弟並著芒屨  
於齋前習行或譏之湛之曰安不忘危也彥回時年十  
餘歲甚有慙色湛之有一牛至所愛無故墮聽事前湛  
之率左右躬自營救之郡中喧擾彥回下簾不視又有  
門生盜其衣彥回遇見謂曰可密藏之勿使人見此門  
生慙而去不敢復還淵位至司徒

江厥字偉卿祐弟子也厥年十二祐被誅聞報至謂家

人曰伯既如此無心獨存赴井死

張欣泰少有志節不以武業自居好隸書讀子史年十餘歲詣吏部尚書褚淵淵問之曰張長弓馬多少欣泰答曰性怯畏馬無力牽弓淵甚異之官至雍州刺史

劉懷珍幼隨伯父奉伯至壽陽豫州刺史趙伯符出獵百姓聚觀懷珍獨避不視奉伯異之曰此兒方興吾家後位至光祿大夫

梁范雲年八歲遇宋豫州刺史殷琰於塗琰異之要就



席雲風姿應對旁若無人  
談令賦詩操筆便就坐者歎  
馬

謝朓莊之子幼聰慧莊器之嘗置左右年十歲能屬文  
莊遊土山賦詩使朓命篇朓攬筆便就瑯琊王景文謂  
莊曰賢子足稱神童復爲後來特達莊笑因撫朓背曰  
真吾家千金孝武帝遊姑熟勅莊携朓從駕詔使爲涸  
井贊於坐奏之起家撫軍法曹行參軍

樂藹晉尚書令廣之六世孫世居江夏其舅雍州刺史

宗慤嘗陳器物試諸甥姪藹時尚幼而所取惟書慤由  
此竒之又取史傳各一卷授藹等使讀畢言所記藹畧  
讀具舉慤益善之終於平越中即將廣州刺史

江倩幼聰慧敏警讀書過目便能諷誦選爲國子生通  
尚書舉高第起家祕書郎

王泰幼敏悟年數歲時祖母集諸孫姪散棗栗於牀上  
羣兒競之泰獨不取問其故對曰不取自當得賜由是  
中表異之位至吏部尚書

王承字安期七歲通周易選補國子生年十五射策高第位至東陽太守

柳惲少子偃字彥游年十二引見詔問讀何書對曰尚書又曰何爲美句對曰德爲善政政在養民衆咸異之詔尚長城公主拜駙馬都尉都陽內史卒

陸雲公字子龍五歲誦論語毛詩九歲讀漢書畧能記憶從祖倭沛國劉顯質問十事雲公對無所失倭顯歎異之終於中書黃門郎

徐勉幼孤貧早勵清節年六歲時屬霖雨家人祈霽率爾爲文見稱耆宿後位至右光祿大夫侍中衛將軍陸績早慧七歲通經爲童子奉車郎

裴邃十歲能屬文善左氏春秋後爲豫州刺史

明山賓七歲能言名理十三博通經傳位至散騎常侍兼國子祭酒假節攝北兗州事卒

王僧孺幼聰慧年五歲讀孝經問投者此書所載述曰論忠孝二事僧孺曰若爾常願讀之有愧其父東李先

以一與之僧孺不受曰大人不見不容先嘗六歲能屬  
文既長好學家貧嘗傭書以養母所寫既畢諷詠亦通  
七歲能讀千萬言後爲北中郎咨議參軍入直西省知  
撰譜事卒

任昉幼而聰敏早稱神悟七歲誦詩數十篇八歲能屬  
文自制月儀辭義甚美褚彥回嘗謂昉父遙曰聞卿有  
令子百不爲多一不爲少由是聞聲藉甚年十二從叔  
咎有知人之量見而稱其小名曰阿堆吾家千里駒也

終於西安太守

張率年十二能屬文嘗日限爲詩一篇稍進作賦頌至年十六向二十許首齊始安王蕭遙光爲揚州召迎主簿不就後歷位黃門侍郎出爲新安太守卒

劉顯幼而聰敏六歲能誦吕相絕秦賈誼過秦論瑯琊王思遠吳國張融見而稱賞號曰神童族伯瓌儒學有重名卒無嗣齊武帝詔顯爲後時年八歲終於西平府  
諮議參軍

劉孝綽幼聰敏七歲能屬文舅中書郎王遇深賞異之嘗與同載識親友號曰神童融每言曰天下文章若無我當歸阿士阿士孝綽小字也時父繪掌詔誥孝綽年未志學繪常使代草之父黨沈約任昉范雲等聞其名並命駕先造焉昉尤相賞好范雲年長繪十餘歲其子孝才與孝綽年十四五及雲通孝綽便申伯季乃命孝才拜之孝綽官至祕書監卒

陳慶之子昕七歲能騎射十二隨父入雒於路遇疾還

京師詣鴻臚卿朱异訪北間形勢昕聚土畫地指麾分別异甚竒之昕終於雲旗將軍

王筠字元禮幼警悟七歲能屬文年十六爲芍藥賦甚美官至太子詹事

蕭乾年九歲補國子周易主祭酒袁昂深敬之

張緬字元長父宏策從高祖義師入伐留緬襄陽年始十歲每聞軍有勝負憂喜形於顏色後爲御史丞遷侍中未拜而卒



王觀年十二五經大義並畧能通既長好學有口辯位  
至左戶尚書

褚玠七歲而孤爲叔父驃騎從事中郎隨所養早有令  
譽先達多以才器許之終於御史中丞

宗慄少聰敏好學晝夜不倦鄉里號爲童子學士仕梁  
官至吏部尚書

褚向年數歲父母相繼亡沒向哀毀若成人者親表咸  
異之官至北齊郎廬陵王長史卒

劉霽年九歲能誦左氏傳宗黨咸異之霽官至建康正  
劉褒年七歲能屬文外祖司空袁昂愛之謂賓客曰此  
兒當成吾宅相褒仕梁官左僕射

劉孺幼聰敏七歲能屬文後位至吏部尚書

劉覽字孝智十六通老易終於左丞

蕭洽幼敏悟年七歲誦楚辭畧能上口官至司徒左長  
史卒

蕭修局力貞固威儀嚴整九歲通論語十一能屬文鴻

臚卿裴子野見而賞之初封宜豐侯官至太保

謝舉年十四嘗贈沈約五言詩爲約稱賞終尚書令

何遜八歲能賦詩嘗爲尚書水部郎卒於仁威廬陵王  
記室

謝幾卿幼清辯當世號曰神童官至左光祿長史卒

蕭密字士機幼聰敏博學有文詞

王籍七歲能屬文後爲唐侯相卒

傅昭六歲而孤哀毀如成人爲外祖所養十歲於朱雀

航賣歷日雍州刺史袁顥見而竒之顥嘗來昭讀書自若神色不改顥歎曰此兒神情不凡必成佳器位至散騎常侍金紫光祿大夫

顧協幼孤隨母養於外從祖右光祿大夫張永永嘗携內外孫姪遊武立山協年數歲永撫之曰兒欲何戲協曰兒正欲枕石漱流永歎息曰顧氏興於此子及長好學以精力稱後拜通直散騎侍郎兼中書通事舍人守鴻臚卿卒

劉敞幼有識慧四歲喪父與羣兒同處獨不戲弄六歲  
誦論語毛詩意所不解便能問難十二讀莊子逍遙篇  
曰此易解耳客因問之隨問而答皆有情理家人每異  
之敞終不娶不仕卒於家

伏挺幼敏悟十歲通孝經論語挺後客遊吳興卒

庾子興幼而岐嶷五歲讀孝經手不釋卷或曰此書文  
句不多何用自苦答曰孝德之本何謂不多後除巴陵  
內史卒

劉昭幼清警七歲通老莊義卒於刺令

庾於陵七歲能言元理弟肩吾八歲能賦詩特爲於陵  
所友悌後於陵終於鴻臚卿肩吾位至江州刺史領義  
陽太守

許懋字昭哲少孤好學爲州里所稱十四入太學受毛  
詩且領師說覆講座下聽者常數十百人官至中庶子  
到沆幼聰敏五歲時父禰於屏風抄古詩沆請讀一遍  
便能諷誦無所遺失終於北中郎諮議參軍

到鏡溉之子也五歲便口授爲詩婉有辭况位至太子  
舍人卒

丘遲八歲能屬文父靈鞠嘗謂氣骨似我黃門侍郎謝  
起宗徵士何點並見而異之終於司空從事中郎

陶季直早慧祖愨祖甚愛異之愨祖嘗以四函銀列置  
於前令諸孫各取季直時甫四歲獨不取人問其故季  
直曰若有賜當先父伯不應度及諸孫是故不取愨祖  
益奇之季直官至大中大夫

江革幼而聰敏早有才思六歲便解屬文父柔之深加賞器曰此兒必興吾門革子從簡少有文情年十七作採荷調以刺何敬容爲當時所賞後爲度支尚書謝病還家除光祿大夫卒

劉之遴八歲能屬文十五舉茂才對策沈約任昉見而異之位至都官尚書太常卿

陳袁憲字德章武帝撰孔子正言章句詔下國學宣制旨義憲時年十四被召爲國子生博士周宏正謂憲父



君正曰賢子今茲策試不數日君正遣門下客岑文豪  
與憲候宏正會宏正將登講坐弟子畢集乃延憲入室  
授以麈尾令憲樹義時謝收何晏在座宏正謂曰二賢  
雖窮與賸得無憚此後生耶何謝於是遽起義端深極  
理致相與往復數番讐對間敏宏正謂宴曰恣卿所問  
勿以童稚相期時學衆滿堂觀者重沓而憲神色自若  
辯論有餘宏正亦起數難終不能屈因告文豪曰卿還  
咨袁吳郡此即已堪見代爲博士矣時生徒對策多行

賄賂文豪請具束脩君正曰我豈得用錢爲兒買第耶  
學司銜之及憲試爭起剝難憲隨問抗答剖析如流到  
漑顧憲曰袁君正其有後矣及君正將之吳郡漑祖道  
於征虜亭謂君正曰昨策生蕭孫徐孝克非不解義至  
於風神氣局去賢子遠矣憲歷官至昌州刺史復授晉  
王長史卒

姚察幼有至性事親以孝聞六歲誦書萬餘言若不好  
弄博奕雜戲初不經心勤苦精厲以夜繼日十二便能

屬文十三梁簡文帝時在東宮盛修文義即引於宣猷  
堂聽講論難爲儒者所稱後爲太子內舍人卒

陸瓊父雲公梁給事中黃門侍郎掌著作瓊幼聰慧有  
詞理六歲爲五言詩頗有詞采大同末雲公受梁武帝  
詔校定碁品到溉朱异以下並集瓊時年八歲於客前  
覆局由是京兆號曰神童异言之武帝有敕召見瓊風  
神警亮進退詳審帝甚異之瓊位至吏部尚書領大著

作

顧野王幼學七歲讀五經知大旨九歲能屬文嘗製日賦梁領軍朱异見而竒之年十二隨父之建安撰建安地記二篇後為黃門侍郎光祿卿卒

陸從典瓊之第三子幼而聰敏年八歲讀沈約集見有迴文硯銘從典援筆擬之便有佳致十三作柳賦其詞甚美瓊時為東宮管記官寮並一時俊偉瓊示以此賦咸竒其異才從父瑜特所賞愛及瑜將命終家中墳籍皆付從典乃集瑜文為十卷仍製集序其文甚工後為

南陽縣主簿卒

陸辯惠侍中繕之子年數歲詔引入殿內辯惠應對進止有父風高宗因賜名辯字敬仁

張正見幼好學有才梁簡文在東宮正見年十三獻頌簡文深贊賞之簡文雅尚學業每自昇座說經正見常預講筵請決疑義吐納和韻進退詳雅四座咸屬目焉  
終於尚書度支郎

岑之敬年五歲讀孝經每燒香正坐親戚咸加歎異十

六策春秋左氏制旨孝經義擢爲高第御史奏曰皇朝  
多士例止明經若顏閔之流乃應高第梁武帝曰何妨  
我復有顏閔耶因召入面試令之敬昇講座敕中書舍  
人朱异執孝經唱士章武帝親自論難之敬剖釋縱橫  
應對如嚮左右莫不嗟服乃除童子奉車郎賞賜優厚  
後爲侍御史征南府諮議參軍卒

杜之偉幼精敏有逸才七歲授尚書稍習詩禮畧通其  
學十五遍觀文史禮儀故事時輩伏其早成僕射徐勉

嘗見其文重其有筆力位至大中大夫

徐敬成幼敏慧好讀書少機警善占對結交文義之士以識鑒知名位至安州刺史

馬樞四歲而父母俱喪爲其姑所養六歲能誦孝經論語老子後邵陵王綸引爲學士

虞寄少聰敏年數歲客有造其父者遇寄於門因嘲之曰郎君姓虞必當無智寄應聲答曰文字不辨豈得非愚客大慚入謂其父曰此子非常人文學之對不足過

也終於大中大夫卒

虞荔幼聰敏有志操年九歲隨從伯闡候太常陸倕問  
五經凡有十事荔隨問輒應無有遺失倕甚異之又嘗  
詣徵士何治時太守衡陽王亦造焉治言之於王王欲  
見荔荔辭曰未有板刺無容拜謁王以荔有高尚之志  
雅相欽重還郡即辟爲主簿荔又辭以年少不就後爲  
太子中庶子領大著作卒

韋載梁黃門侍郎正之子少聰慧篤志好學年十一叔



父稜見沛國劉顯問漢書十事載隨問應答曾無疑滯  
及長博涉書史流敏有器局位至散騎常侍太子右衛  
卒

謝貞年七歲母王氏授論語孝經讀訖便誦八歲嘗爲  
春日閒居五言詩從舅尚書王筠竒其有佳致謂所親  
曰此兒方可大成至如風定花猶落乃追步謝惠連矣  
由是名輩知之年十三畧通五經大旨尤善左氏傳工  
章隸蟲篆終於南平王友掌記室事

徐凌八歲能屬文十二通莊老義既長博涉史籍縱橫  
有口辯凌子份少有父風年九歲爲夢賦凌見之謂所  
親曰吾幼屬文亦不如此後爲左光祿大夫太子少傅  
卒

裴忌少聰敏有識量頗涉史傳爲當時所稱解褐豫章  
王法曹叅軍終於上開府

周宏正幼孤及弟宏讓宏直俱爲叔父捨所養年十歲  
通老子周易捨每與談論輒異之曰觀汝神情穎悟清

理警發後世知名當出吾右十五名補國子生仍於國  
學講周易諸生博習其義以季春入學孟冬應舉學司  
以其日淺勿之許焉博士到洽議曰周郎年未弱冠便  
自講一經雖曰諸生實堪師表無俟策試起梁家大學  
博士

傅緯幼聰敏七歲誦古詩賦至十餘萬言長好學能屬  
文後爲祕書監右衛將軍兼中書通事舍人掌詔誥

蔡徵幼聰敏精識強記年六歲詣吏部尚書河南褚裒

相嗟其穎悟位至給事郎

張譏幼聰俊有思理年十四通孝經論語篤好元言受學於汝南周宏正每有新意爲先輩推伏終於國子博士東宮學士

陰鏗幼聰慧五歲能誦詩賦日千言後官至晉陵太守員外散騎常侍

王元規八歲而孤兄弟三人隨母依舅氏往臨海郡時年十二郡土豪劉填者資財巨萬欲妻以女母以其兄

弟幼弱欲結強援元規泣請曰因不失其親古人所重  
豈得苟安異壤輒婚於非類母感其言而止終於秦王

東閣祭酒

冊府元龜卷七百七十四

欽定四庫全書

冊府元龜卷七百七十五 宋 王欽若等撰

總錄部

幼敏第三

後魏賈彞字彥倫父爲苻堅鉅鹿太守生訕謗繫彞年  
十歲詣長安訟父獲申遠近歎之僉曰此子英俊賈誼  
之後莫之與京後太祖即位拜尚書左丞加給事

崔元伯少有俊才號曰冀州神童苻融牧冀州虛心禮

敬拜陽平公侍郎領冀州從事後位至天部大人進爵  
爲公

李丞字伯業寶之子也少有奇畧太武時寶欲謀歸款  
民僚多有異議丞時年十三勸寶速定大計於是遂決  
仍令丞隨表入質太武深相器異禮遇甚優賜爵姑臧  
侯

陸琇字伯琳猷第五子猷有以爵傳琇之意琇年九歲  
猷謂之曰汝祖東平王有十二子我爲適長承襲家業



今已年老屬汝幼冲詎堪爲陸氏宗首乎琇對曰苟非  
鬪力何患童稚馭竒之遂立琇爲世子

韋纘荊州刺史彌之子年十三補中書學生聰敏明辯  
爲博士李彪所稱除祕書中散

裴安祖少而聰慧年八九歲就師講詩至鹿鳴篇語諸  
兄云鹿雖禽獸得食相呼而況人也自此之後未曾獨  
食

裴駿字神駒幼而聰慧親表異之稱爲神駒因以爲字

位至中書侍郎

胡叟字倫許少聰慧年十三辯疑釋理知名鄉國其意之所悟與成人交論尠有屈焉叟以姚氏將衰遂入長安觀風化隱匿名行懼人見知時京兆韋祖思少閱典墳多蔑時彥知叟至召而見之祖思習嘗待叟不足聊與溫良叟拂衣而出祖思固留之曰當與君論天人之際何遽而反乎叟對曰論天人者其亡久矣與君相知何夸言若是也遂不坐而去至主人家賦杜韋二族一

宿而成時年十有八歲具述前載無違舊美敘中世有  
協時事而未及鄙瀆人皆竒其才畏其筆世有傳誦之  
以爲笑狎叟後拜武威將軍賜爵始復男卒

李志字鴻道博學有幹才年十餘歲便能屬文父彪甚  
竒之

李安世太尉祥之子幼而聰悟興安二年文成引見侍  
郎博士之子簡其秀雋者欲爲中書學生安世年十一  
帝見其尚小引問之安世陳說父祖甚有次第即以爲

生帝每幸國學嘗獨被引問詔曰汝但守此至大不慮  
不富貴

祖瑩范陽人八歲能誦詩書十二爲中書學生內外親  
屬呼爲聖小兒後歷秘書監遷車騎將軍

李琰之字景珍司空詔之族弟早有盛名時人號曰神  
童位至兼侍中車騎大將軍左光祿大夫

袁翻子聿修九歲州辟主簿性深沉有鑒識清靜寡欲  
與物無競姨夫尚書崔林深知所賞

李謚涿郡人年十三通孝經論語毛詩尚書歷數之術  
尤盡其長州閭鄉黨有神童之號後徵拜著作郎辟以  
授第郁公府二辟皆不就及卒命謚曰貞靜處士表其  
門曰文德里曰孝義

北齊邢邵十歲便能屬文雅有才思聰明強記日誦萬  
餘言族兄彎有文鑒謂子弟曰宗室中有此兒非常人  
後爲太常卿中書監攝國子祭酒復授特進卒

杜弼幼聰敏家貧無書年十二寄郡學受業教授之際

師每竒之位至膠州刺史

王紘性機敏應對辯捷年十三見揚州刺史太原郭元貞元貞撫其背曰汝讀何書對曰誦孝經曰孝經云何曰在上不驕爲下不亂元貞曰吾作刺史豈其驕乎紘曰公雖不驕君子防未萌亦願留意元貞稱善年十五隨父在北豫州行臺侯景與人論掩衣法爲當左爲當右尚書敬顯雋曰孔子云微管仲吾其被髮左衽矣以此言之左衽爲是紘進曰國家龍飛朔野雄步中原五

帝異儀三王殊制掩衣左右何足是非景竒其早慧賜以名馬後官至散騎常侍兼侍中

李繪字敬文年六歲便自願入學家人以偶年俗忌約而弗許遂伺其伯妹筆牘之間而輒竊用未幾遂通急就章內外異之以爲非常兒也天保初爲司徒右長史卒

徐之才幼而儁發五歲誦孝經八歲畧通義旨曾與從兄康造梁太子詹事汝南周捨宅聽老子捨爲設食乃

戲之曰徐郎不用心思義而但事食乎之才答曰蓋聞  
聖人虛其心而實其腹捨嗟賞之年十三召爲大學生  
粗通禮易彭城劉孝綽河東裴子野吳郡張嶮等每共  
論周易及喪之服儀酬答應之如響咸共歎曰此神童  
也位至僕射卒

楊愔字遵彥小名秦王宏農華陰人父津魏時累爲司  
空侍中愔兒童時口若不能言而風度深敏出入門閭  
未嘗戲弄六歲學史書十一受易好左氏春秋幼喪母



曾詣舅源子恭子恭與之飲問讀何書曰誦詩子恭曰誦至渭陽未邪悒便號泣感噎子恭亦對之飲歎遂爲之罷酒子恭後謂津曰嘗謂秦王不其察慧從今已後更欲刮目視之悒一門四世同居家甚隆盛昆季就學者三十餘人學庭前有李樹實落地羣兒咸爭之悒頽然坐其季父暉適入學館見之因大嗟異顧謂賓客曰此兒恬裕有我風宅內有茂竹遂爲悒於林邊別葺一室命獨處其中嘗銅盤具盛饌以飯之因以督厲諸子

曰汝輩但如遵彥謹慎自得竹林別室銅盤重肉之食  
惜從父兄黃門侍郎昱特相器重曾謂人曰此兒駒齒  
未落已是我家龍文更十歲後當求之千里外後拜尚  
書令又拜特進驃騎大將軍

李稚廉趙高邑人齊州刺史義深之弟少而寡欲爲兒  
童時初不從家人有所求請嘗故以金寶授之終不取  
強付輒擲之於地州牧以其蒙稚而廉故名曰稚廉聰  
敏好學年十五頗尋覽五經章句嘗爲青州刺史未幾

徵爲并省都官尚書卒

孫靈暉深州武強人魏大儒祕書監惠蔚靈暉之族曾  
王父也靈暉少明敏有器度惠蔚一子早卒其家書籍  
多在焉靈暉年七歲便好學日誦數千言惟尋討惠蔚  
手錄章疏不求師友三禮及三傳皆通宗旨然始就鮑  
季詳熊安生質問疑滯其所發明熊鮑無以異也後爲

大將軍司馬

蘇瓊字珍之幼時隨父在邊嘗謁東荊州刺史曹芝芝

戲問曰卿欲官否對曰設官求人非人求官芝異其對  
署爲府長流參軍後爲博陵太守

和士開幼而聰慧選爲國子學生解悟捷疾爲同業所  
尚武平元年封淮王除尚書令錄尚書事

後周檀翥字鳳翔高平金鄉人六世祖毓晉步兵校尉  
父江始還北任至太常少卿翥十歲喪父還京師宅與  
營人雜居幼孤寒不與鄰人來往好讀書解屬文能鼓  
琴早爲瑯琊王誦所知

宗慄少聰敏好讀書晝夜不倦語輒引古事鄉里呼爲  
小兒學士後拜車騎大將軍卒

韋瑱字世珍聰敏有夙成之量閭里咸敬異之後位至  
侍中驃騎大將軍

柳慶年十三時父僧習爲潁川郡地接都畿民多豪右  
將選鄉官皆依倚貴勢競來請託選用未定僧習謂諸  
子曰權貴請託吾并不用其使欲還皆須有答汝等各  
以意爲吾作書也慶乃具書草云下官受委大邦選吏

之日有能者進不肖者退此乃朝廷常典僧習讀書歎曰此兒有意氣大丈夫理當如是即依廢所草以報後爲宜州刺史入爲司會卒

李旭頓邱臨黃人小名那祖彪名重魏朝爲御史中尉父游亦有才行爲當世所稱游兄志爲荊州刺史游從至州屬爾朱之亂與志俱奔江左旭性峻急不雜交游幼年已解屬文有聲雒下時雒陽創置明堂旭年十數歲爲明堂賦雖優洽未足才制可稱觀者咸曰有家風

矣

長孫澄字士亮魏太師稚之子年十歲司徒李瑒之見而竒之遂以女妻焉十四從征討有策謀勇冠諸將後拜大將軍封義門公爲玉壁總管卒

李賢字賢和九歲從師受業畧觀大旨而已不尋章句或謂之曰學不精勤不如不學賢曰夫人各有志賢豈能強學待問領徒受業即惟當粗聞教義補已不足至如忠孝之道實銘之於心問者慚服位至大將軍

賢子崇文字永隆以父賢勲封迴雒縣侯時年少拜爵  
親族相賀崇獨泣下賢問之對曰無勲於國幼少封侯  
當報主恩不得終於孝養是以悲耳賢由此大奇之位  
至大府中丞大夫

斛斯徵字士亮太傅尚書令椿之子幼聰穎五歲誦孝  
經周易識者異之及長涉羣書尤精三禮後爲太子太  
保

柳霞幼而爽邁神采嶷然髫歲便有成人之量篤好文



學動合規矩其世父慶遠特器異之後為驃騎大將軍  
霍州刺史卒

劉祥幼而聰慧占對俊辯賓客見者號為神童年十歲  
能屬文十二通五經

顏之儀幼穎悟三歲能讀孝經位至集州刺史

蕭大園幼而聰敏神情俊悟年四歲能誦三都賦及孝  
經論語七歲居母喪便有成人之性後為內史侍郎西  
河郡守卒

蕭橋字智遐梁武帝弟安成王秀之子也性溫裕有儀表年十二入國學博觀經史雅好屬文在梁封永豐縣侯

沈重字德厚吳興武康人性聰悟有異常童七歲而孤居喪合禮位至散騎常侍太常卿

張元字孝始年六歲祖父成以夏中熱欲將元就井浴元固不肯從謂其貪戲乃以杖擊其脛曰汝何爲不肯洗浴元對曰衣以蓋形爲覆其褻不能露其體於白日

之下祖異而捨之南鄰有二杏樹杏熟多落元園中有諸小兒競取而食之元所得者送還其主

鄭譚年十餘歲嘗詣相府司錄李長宗長宗於衆中戲之譚從容謂長宗曰明公位望不輕瞻仰斯屬輒相翫狎無乃喪德長宗甚異之

隋王述字長述後周驃騎大將軍罷之孫少聰敏有識度年八歲周太祖見而奇之曰王公有此孫足爲不朽後位至大將軍復授行軍總管

于仲文後周大佐輒實之子九歲嘗於雲陽宮見周太祖問曰聞兒好讀書書有何事仲文對曰資父事君忠孝而已太祖甚嗟歎之後爲右翊衛大將軍進位光祿大夫卒

裴政字德表幼學明敏博聞強記達於時政爲當世所稱年十五辟邵陵王府法曹參軍事終於襄州總管

于宣敏字仲達少沉密有才思年十一詣周趙王命之賦詩宣敏爲詩甚有幽貞之志王大奇之坐客莫不嗟

賞位至奉車都尉

史萬歲京兆杜陵人父靜周滄州刺史萬歲少英武善騎射驍捷若飛好讀兵書兼精占候年十五值周齊戰於印山萬歲時從父入軍旗鼓相望萬歲令左右趣治裝急去俄而周師大敗其父由是竒之後爲河州刺史行軍總管

蘇夔八歲誦詩兼解騎射年十三從父威至尚書省與安德王雄馳射賭得駿馬而歸十四詣學與諸儒議論

詞致可觀見者皆稱善位至通議大夫

李德林幼聰敏年數歲誦左思蜀都賦十餘日便畢高  
隆之見而嗟嘆遍告朝士云若假其年必爲天下偉器  
鄴京人士多就宅觀之月餘日中車馬不絕年十五誦  
五經及古今文集日數千言後終於懷州刺史

宇文欣字仲樂幼而敏慧爲兒童時與羣輩戲輒爲部  
伍進止行列無不用命者位至右領軍大將軍

韋師字公頴少沉謹有至性初就學始讀孝經捨書而

歎曰名教之極其在茲乎終於汴州刺史

楊异字文殊美風儀沉深有器局韶齒就學日誦千言見者竒之後爲刑部尚書除吳州總管卒

柳肅少聰敏閑於占對起家周齊王文學武帝見而異之召拜宣納上士位至工部侍郎

韋世康幼而沉敏有器度年十歲州辟主簿後拜荊州總管卒於家

劉顯字嗣芳幼而聰敏當時號曰神童

辛德源字孝基沉靜好學年十四解屬文及長博覽書  
記後爲諮議叅軍

陸爽字開明少聰敏年九歲就學日誦二千餘言齊尚  
書僕射楊遵彥見而異之曰陸氏代有人焉官至太子  
洗馬

胡克讓年十四釋褐梁湘東王法曹叅軍時舍人朱异  
在儀賢堂講老子克讓與焉堂邊有修竹异令克讓詠  
之克讓攬筆輒成其卒章曰非君多愛賞誰貴此貞心



異甚竒之後爲通直散騎常侍卒

游元字楚客少聰敏年十六齊司徒徐顯秀以爲叅軍  
事後位至朝請大夫兼侍御史

何妥字棲鳳西域人少機警八歲游國子學助教顧良  
戲之曰汝既姓何是荷葉之荷爲是河水之河應聲答  
曰先生姓顧是眷顧之顧是新故之故衆咸異之終於  
國子祭酒

庾質字行修少而明敏早有志向八歲誦梁世祖元覽

言志等十賦拜童子卽位至太史

袁充少警悟年十餘歲其父黨至門時冬初充尚衣葛衫容戲充曰袁卽子締兮綌兮淒其以風充應聲答曰惟締與綌服之無斃以是大見嗟賞後位至祕書令

盧大翼字協昭河間人本姓章仇氏七歲詣學誦數十言州里號曰神童及長間居味道不求榮利卒於雒陽  
庾季才幼穎悟八歲誦尚書十二通周易好古元象後  
爲通直散騎常侍

崔頤字祖濬七歲能屬文容貌短小有口才開皇初秦  
孝皇薦之射策高第後爲越王長史

薛道衡字元卿河東汾陰人祖聰衛齊州刺史父季通  
常山太守道衡六歲而孤專精好學年十三講左氏傳  
見子產相鄭之功作國僑贊頗有詞致見者竒之後才  
名益著位至司隸大夫

許善心字務本九歲而孤爲母范氏所鞠養幼聰明有  
思理所聞輒能誦記多聞默識爲當世所稱家有舊書

萬餘卷皆遍通涉十五解屬文牋上父友徐陵大奇之  
謂人曰才調極高此神童也後爲給事中

薛世雄爲兒童時與羣輩遊戲輒畫地爲城郭令諸兒  
爲攻守之勢有不從令者世雄輒撻之諸兒畏憚莫不  
齊整其父見而奇之謂人曰此兒當興吾家矣位至左  
禦衛大將軍

房彥謙字孝冲早孤不識父爲母兄之所鞠養長兄詢  
雅有清鑒以彥謙天性穎悟每奇之親教之讀書年七

歲誦數萬言爲宗黨所異終於涇陽令

卽茂少敏慧七歲誦騷雅日千餘言後爲尚書左丞

鮑宏字潤身父機仕梁爲治書侍御史宏七歲而孤爲  
兄泉之所愛育年十二能屬文嘗和湘東王繹詩嗟賞  
不已引爲中記室位至均州刺史

唐陳叔達初在陳年十餘歲嘗侍宴賦十韻援筆便就  
僕射徐陵甚竒之貞觀中位至吏部尚書

蘇世長父振仕周爲岩州刺史武帝時世長十餘歲上

書言事帝以其年少召問讀何書對曰讀孝經論語武  
帝曰孝經論語何所言對曰孝經云治國者不敢侮於  
鰥寡論語云爲政以德帝善其對令於獸門館讀書武  
德中爲天策府軍諮秦府開引爲學士

高士廉幼而精爽絕倫占對敏慧位至開府儀同三司  
李百藥字重規博陵安平人父德林仕隋內史令百藥  
幼而聰敏年數歲德林於燈下教以四聲一聞便解七  
歲頗能屬文齊中書舍人陸叡嘗過德林宴齋有誦徐

陵文者云將刈琅琊之稻生客並不識其事百藥進曰  
傳稱邠人籍稻杜預注云邠國在琅琊開陽縣又等驚  
喜云此兒神童也官至宗正卿

百藥子安期幼聰辯七歲解屬文終於荊州大督都府  
長史

孔穎達年八歲就學日讀千餘言至暮更誦未嘗嬉戲  
有異凡童三禮義宗盡能闇記官至國子祭酒

房元齡幼而聰敏五歲能誦毛詩及乎志學尤工草隸

博覽墳史位至司空

呂方毅才之子年七歲能誦周易毛詩太宗聞其幼敏  
召見甚竒之賜以緜帛

王勃字子安太常博士福時子也六歲善屬文與兄勔  
勳俱稱少俊父友杜易簡嘗稱曰此王氏三珠樹也

楊烱幼聰敏博學善屬文應神童舉拜校書郎爲崇文  
館學士

孫思邈京兆華原人也七歲就學日誦千餘言顯慶中



高宗召拜諫議大夫不受

狄仁傑字懷英爲兒童時閤人有被害者縣吏就詰之衆皆接對惟仁傑堅坐讀書吏責之仁傑曰黃卷之中聖賢備在尤不能接對何暇偶俗吏而見責耶位至內史

元萬頃河南人德州總管白澤之孫也幼解屬文起家爲通事舍人

孫述幼而英俊文思敏速始年十五謁雍州長史崔日

用日用小之令為士大爐賦握翰即成辭理典贍日用  
覽之駭然遂為忘年之交以是價譽益重開元初應哲  
人奇士舉

韋陟字殷卿尚書左僕射安石之子少聰穎頗異常童  
自幼風標整峻獨立不羣安石尤愛之位至吏部尚書  
東京留守

蘇震京兆武功人少以門蔭補千牛聰敏好學博涉經  
史年未志學有老成人風伯頊異之嘗謂所親曰吾家

有子矣

嚴武中書侍郎挺之之子神氣俊爽敏於聞見幼有成人之風讀書不究精義涉獵而已弱冠以門蔭策名隴右節度使哥舒翰奏充判官後為城都尹改檢校吏部尚書封鄭國公

楊綰生而聰慧年四歲處羣從之中敏識過人嘗夜宴親賓客舉坐中物以四聲呼之諸賓未言綰應聲指鐵燈樹曰燈盞柄曲衆咸異之位至中書侍郎同中書門

下平章事

劉晏字士安曹州南華人年七歲舉神童授秘書省正字終於忠州刺史

高郢字公楚其先渤海蓀人九歲通春秋能屬文郢子定幼聰警絕倫年七歲時讀尚書湯誓問郢曰奈何以臣伐君郢曰應天順人不爲非道又問曰用命賞於祖不用命戮於社是順人乎父不能對定仕至京兆叅軍房孺復太尉綰之子少慧黠年七八歲即解綴文親黨

奇之位至容州刺史本管經畧使

權德輿生四歲能諷詩十五爲文數百篇編爲董蒙集  
十卷名聲日大後爲檢校吏部尚書出鎮回元卒

蔣義字德源其先常州義興人後徙家於河南國子司  
業集賢學士蔣明之子史官吳競之外孫代以儒學稱  
年七歲讀庾信哀江南賦數遍而能暗記始以聰敏精  
強聞於親黨弱冠該博羣籍時論以史職許之位至秘

書監

令狐楚字殼士世以儒雅著稱楚少強記年十五善屬文位至檢校左僕射興元尹充山南西道節度使

李聰西平王太尉晟之第十三子七歲以蔭授太常寺協律嘗入公署胥吏小之不敬聰鞭之見血西平因大奇之

元禎九歲能屬文十五明兩經擢第太和中終於檢校戶部尚書兼鄂州刺史

李德裕宰相吉甫之子幼而壯志苦心力學吉甫每以

敏辯誇於同列武元衡曾召之謂曰吾子在家所嗜何  
書意欲探其志也德裕不應翊日元衡具以告吉甫因  
戲曰公誠涉大癡耳吉甫歸以責之德裕曰武公身為  
帝弼不問理國調陰陽而問所讀書書者成均禮部之  
職也其言不當所以不應吉甫復告元衡大慚由是振  
名德裕會昌中爲太尉宣宗時爲東都留守後累貶崔  
州司馬卒

郭承嘏字復卿汾陽王子儀曾孫生而異乳保之間即

好筆硯比及成童能誦五經

楊牧七歲喪父居喪有如成人而母長孫夫人知書親自教授十三畧通諸經義善於文詠吳人稱爲神童兄發戲令詠蛙卽曰澗邊分玉樹龍底耀銅儀會當同鼓吹不復問官私又令詠筆仍賦鑽字卽曰雖非囊中物何堅不可鑽一朝操政柄定使冠三端每良辰美景吳人造門觀神童請爲詩什觀者壓敗其藩後自宣歙觀察使貶端州司馬尋削官封



梁羅周敬年七八歲學賦詩往往傳於人口

後唐馬希範湖南節度使殷之第三子少而溫雅稍涉  
文史開平中授著作佐郎國子博士俄解金紫光祿大  
夫檢校右僕射典湖南親軍同光中殷遣希範入貢莊  
宗問洞庭廣狹希範對曰洞庭至狹若車駕南巡止可  
飲馬莊宗拊背嘉之超授檢校太保永州刺史

李琪年十三詞賦詩頌大爲王鐸所知然亦疑其假手  
一日鐸召父穀讌於公署密遣人以漢高祖得三傑賦

題就其第試之琪援筆立成賦尾云得士則昌非賢罔  
共龍頭之友斯貴鼎足之臣可重宜哉項氏之所以亡  
一范增而不能用鐸覽而駭之曰此兒大器也將擅文  
價

趙美幽州節度使德鈞之孫天成四年德鈞奏美年五  
歲默念何論孝經令於汴州取解就試勅封尉之孫能  
念儒書備彰家訓不勞就試特與成名宜賜別勅及第  
仍附今年春榜

晉盧質幼聰慧善屬文年十六陝帥王重盈奏授芮城令

安元信幼爲兒童時嘗與里中同輩戲爲營陣獨申明進退交擊之勢宛成部分邑之耆老有尚懷古者謂元信父萬金曰此子成人必達軍旅之事若賦以壽則爲將爲侯爾其志之後至耀州團練使

漢李崧深州饒陽人父舜卿本州錄事叅軍崧幼而聰敏十餘歲爲文家人竒之弱冠本府署爲叅軍其父嘗

謂宗人李璘曰大醜生處竒形氣異前途應不居徒勞之地賴吾兄誨激之

大醜即崧之小字也

後至宰相

周皮台符字光信深州武強人幼善屬文唐同光中擢進士第釋褐為鎮定從事位至翰林學士

和凝幼而聰敏姿狀秀拔神彩射人少好學書一覽者咸達其大義後至相位

王朴幼警慧好學善屬文位至樞密使

冊府元龜卷七百七十五